



黃氏攜殘集序

余於康熙庚申歲曾至姚江訪黃梨洲先生於黃竹浦見其所居諸山前列大江後繞十餘里內邨邨相望皆黃氏也因思以忠端公之節義復繼以先生之理學文章余得身至其里殆更勝於過柴桑問浣花也黃氏自雀山來居茲地爲始祖子姓緜衍旣饒甲科亦代有聞人惜其詩文著作皆零落散失無有存者先生攜搜於殘編斷簡而得文僖以下八人詩文彙爲一帙名曰攜殘志實也嗣子主一積學善文護視父書不異目睛顱髓矧是帙又爲諸祖上精靈傳否之所關謀殺青事於族兄仲簡慨然任之并刻先生所著之黃氏家錄及已所集之黃氏續錄而問序

於余余思子孫之於祖宗貴有精氣以相接而不僅在髮
膚之受也是故有祖父之學問文章如爲其子孫茫然不
識爲何物則雖名爲繼體其於先人之精氣已兩相隔絕
吾謂縱有蒸嘗可知其必不來格來歆矣安賴有子孫哉
昔餘姚有老儒莫英公者苦吟一世臨歿其子悉收其橐
納之棺中又有應氏者見先世之遺文塵鼠埋齧取於祭
享時伴紙錢焚之如此者實比比也黃氏先世之文若詩
旣失矣幸有黎洲先生收殘燄於冷灰使得復現光於人
眼然不廣其傳或不免有復失之慮仲簡而知汲汲於此
不足多乎哉且余聞仲簡幼貧失學長事貿遷闖闖中人
也徙於雲間者三世追念本源年逾七十數至姚江遡尋
宗譜欷歔故里返祖父之木主於宗祠捐資田以永其享
斯於一本之精氣直貫於幽冥矣

康熙壬午年十月朔崑山徐秉義書

黃氏攬殘集序

子孫之所以爲繼體者貴於祖父有精神心血之相浹而不僅在身體髮膚之受也是故有名祖父而能克承家學方爲肖子肖孫卽不然能重係其著述而發揚之使祖宗精神心血之所存不至於湮沒亦其次焉者也吾師黃梨州先生承忠端公忠義之後清風高節理學文章爲世宗仰無俟余言世居姚江先世饒有名德聞人亦饒有詩文著作惜其零落散亡無有存者吾師攬摭於殘編斷簡而得文僖開州道南蟄菴潁州半山丁山景州八人詩文若干首都爲黃氏攬殘集一帙嗣君主一吾畏友也家聲世德常懷難繼之憂十餘年以來絕意進取孜孜惟以讀父

書爲事此真志切於家學者一日手是集謂余曰是我先子之所手錄也博收於散軼之餘而得此家貧不能謀劄今幸有族兄仲簡任刻子其爲我序此一段以弁其首余問仲簡何如人主一曰賢遷中人也徙居雲間者三世矣不勝水源木本之思年逾七十數來姚江捐貲以修始祖之廟又買田以永蒸嘗今復有是刻蓋吾黃氏數千人不克任而仲簡獨任之余不禁喟然曰有是哉吾見天下之爲子孫者惟知能保先世所遺之田園產業便稱爲守成之令嗣而於祖父之著述往往任其爲雲煙之過眼者雖自任爲讀書中人多不免此彼視先人所遺之家業重精神心血所存之學業輕也黃氏祖先之詩文幸有吾師收拾之於前然而不克壽諸梓或不免復有散軼之慮仲簡而能知亟亟於此雖不事詩書其視世之自任爲詩書中人者不轉加一等哉

康熙壬午九月上浣甬東仇兆鰲書

黃氏攬殘集目錄

文僖公集目

詩

喜雨應制

經筵日講賜宴

賀年姪王伯安登第

送張別駕之任

送天元謫官長沙

送幕賓之任

贈張封君八旬

贈黃母八旬

贈張侍御齊壽歸慶

贈金川謝世拙

攜子遊越泥山

聞兩廣之捷

擬御製勸農歌

楊震却金圖

文

論用人疏

皇明開國功臣錄序

附見開州文一首

百家謹案開州諱文煥號吳南文僖公之孫歷任開州學

正

東閣私抄序

道南先生詩目

前有遺獻文孝公序并尹正言道南八景詩序

石枰遺跡

閒居

登龍山

友梅

題徐處士梅月軒

綠猗書屋為方僉憲大本題

赤嶺龍湫

拳石迴瀾

屏山擁翠

自題所居梅月軒

道南八景

通德高門

附和詩

魏瀚
蕭子鵬

林聰
邵曦

蔣誼
張淵

張弼
桑悅

招賢舊里

附和詩

魏瀚
丁備

邢簡
李迪

蔣誼
張淵

張弼
桑悅

鶴橋環碧

附和詩

魏瀚
蕭子鵬

邢簡
桑悅

張弼

蔣誼

雁嶺來青

附和詩

魏瀚
蔣誼

林聰
蕭子鵬

張弼
邵曦

丁備

丁山一泉

附和詩

魏瀚
桑悅

張弼
蔣誼

邢簡

邵曦

沙浦九曲

附和詩

魏瀚
桑悅

張弼
蔣誼

邵曦

李迪

槐屋春陰

附和詩

魏瀚
張淵

林聰
桑悅

蔣誼

丁備

桂林秋色

附和詩

魏瀚
張淵

邢簡
邵曦

丁備
桑悅

蔣誼

半山先生詩目

前有公序

文孝

山行

述懷

秋夜述懷

春日卽事

西湖圖次韻

花朝小酌有懷

和李義山無題四首

迴文二首

九日客懷

遊寺

月夜登樓

悼史姪婿

寓襄陽鐵佛寺

送別

卽事

述懷

秋曉

田家

懷友

見雁

夜窓

芙蓉

潁州集目

有文
孝公序

詩

五河舟中

南安旅泊

至欽州作

憶親

懷遠舟中

書懷

憶兄

憶弟

有感

文

燕思堂記

丁山先生詩目

有楊秘圖珂壽言為序

幽居

自訟

睡起

遊西愚陳公園

訪魏四山留宿聞虎

琴

題扇

鵲鴿圖

次錢塘回文

景州詩目

有公序文孝

初夏田家

閏九月遊碧霞洞

送張鳳埜尉江陰

秋日過石橋庄

中秋無月小叙西軒

同秘圖訪馬魯原不遇

憶別

過秘圖宅待月

暮春六言二首

富春舟中

剡道

留別陸陽山

送新渠之南都

同紫橋天池集白馬山

過孫霽峯書屋

海上歌聞淞之捷二首

同孫石窓步白雲寺

睡起

病起秘圖過山居

白雲寺

讀書筠泉山庄

初夏村居

過姚村

夏日喜還山居

秋日晴望

三溪道中

春日游花家山

採茶女

春晚秘圖過訪

山館

過王右軍故宅

閨思

聽松

過項氏園

過徐鷺洲園觀白鷗

鷺洲雨中送芍藥

野舟

閒咏

上巳集大觀軒

聽雨

積雨懷社中諸公

落花

訪韋茗少參

松樂亭步月

紫陽山觀演武江上

山窓

暮秋過項園逢俞養冲

秋興三首

有客

初夏秘圖過訪

早秋集南屏入翠樓

中秋懷秘圖

夏日訪雲江不值三首

山居

睡起孫清溪偶過

暮春

發儀真

過孫樂隱山房三首

山居成秘圖見過

九月登龍山

八月晦日集遠覽樓

盛暑集眾樂園

夏日幽居

曉過燭湖東孫容峯

太虛樓晚眺

元夕雨

烹茶

天竺遇王鍊師

觀白牡丹

冬曉山行

丁卯歸田東秘圖

東歸卜宅

再遇半山堂

茅菴

踏青

玉蘭堂訪渠翁不值三首

葢山戒珠寺

溽暑憇秘圖書屋二首

初夏歸山中

眾樂送渠翁之越

春詞四首

春晝

初夏

挽楊秘圖

蟄菴詩目

有倪小野竹橋十咏
序道傳先生集序

竹橋十咏

通德名鄉

附和詩

倪宗正
徐彬

管溥

招賢故里

附和詩

同前

官埭義塾

附和詩

同前

平原別墅

附和詩

同前

箭山擁翠

附和詩

同前

剡水環碧

附和詩

同前

東溪觀漲

附和詩

同前

西浦臨清

附和詩

同前

黃氏攜殘集目錄終

黃氏攜殘集目錄

黃氏攬殘集

族孫宗義攬殘

寓雲間姪炳付梓男百家募校

文僖公集序

公諱珣字廷璽孕十四月而生讀書過目成誦舉成化鄉試第一人越辛丑殿試第一甲第二人授翰林院編修弘治改元與修憲廟實錄二年充經筵官是歲書成陞侍講賜宴及金幣四年充經筵講官尋進右春坊右諭德管司業事十七年陞國子祭酒明年陞南京吏部右侍郎正德二年陞本部尚書逆瑾勒令致仕九年卒於家年七十有七贈太子太保蔭子一人嘉靖十年追諡文僖公為人簡易忠實凡經筵進講於理亂興衰之事必反覆開陳以感

黃氏撰錄集
悟天衷在太學於諸生甚有恩意山西魏成家貧不能歸
欲改適其女以爲資斧公卽撥門差以濟之一時士人傳

頌正德初與三山林瀚條陳十二事曰隆大孝以先天下

事無巨細無內外惟倣先帝所已行者而力行之

集羣議以決大政

近來旨由中出內閣之所

擬議者徑行改易

改州治以奉陵寢崇儉德以裕財用省虛費以

甦軍民增貢舉以進人才修武備以禦寇盜省匠役以甦民困節工役以省財用清吏役以革宿弊清馬政以防欺蔽大優容以廣言路疏上瑾深恨之瀚降左叅政致仕公亦去位瑾復矯詔指公與瀚及劉健謝遷劉大夏韓文張敷華等爲朋黨頒示天下公與謝遷同邑故瑾恨餘姚人尤甚凡京朝官俱外轉無留者其詩文典雅平淡如其爲

人所著有紛紛論稿惕齋稿東山文集素菴詩集藏於家族孫宗義識

文僖公集

詩

喜雨應制

吾皇齋沐慰民憂佳氣氤氳副所求風捲金蛇騰鳳闕雲
拖銀竹徑龍樓三農喜色看多稼萬國歡聲賀有秋深媿
無才叨近侍願賡天保頌宸旒

經筵日講賜宴

明時官職重經筵殊遇真應夙世緣惟有獻芹難解誚更
無折柳可繩愆素餐平日慙無地盛宴今朝喜自天醉飽
歸來成一笑玉堂清夜照金蓮

賀年姪王伯安登第

羨我同年老狀頭賢郎名位頗相侔龍山佳氣重重見舜
水恩波滾滾流調味查梨同入鼎濟川橋梓共爲舟相看
盡道登科樂却合同擔廊廟憂

送張別駕之任

昔年發解振文華今日承恩驛路賒漫羨老成新別駕須
知清白舊名家徵科好問窮民瘼撫字應宣玉殿麻小試
不勞思往事鳳雛行看曲江花

送天元謫官長沙

越中人物玉無瑕壯歲曾探上苑花總羨文恭司禮闕誰
知賈誼傳長沙別乘一駕湖南道夢入三關薊北涯事出
匪躬仍顧問寵徵早晚沐恩嘉

送朱幕賓之任

羨君家世舊弓裘蚤事詩書泮水遊十載文名揚薄海一
官蓮幕佐祥州潞河開棹桃花曉南嶺停車荔子秋自是
亨衢騰驥足遐方未許久淹留

贈張封君八句

甲子重過二十春賢郎初試豸冠新已看鳳闕封章疊况
復鸞幃壽算均遙戲彩衣真愛日遠將春酒益瞻雲愧余
亦是宦途路几杖無由與介僕

贈黃母八句

中閨懿行共推稱教子明時見李膺花甲眼前幾過半雲
孫膝下已添曾菊筵朱翟祥光集青瑣萊衣瑞靄迎更願

黃氏撰錄集
遐齡等松柏龍章叠叠寵恩承

贈張侍御齊壽歸慶

白雲深處畫堂幽培植萱椿幾度秋
挺挺修筵同不老森森直幹並忘憂
煙濃色浸長生酒日煖香沾百薦羞
簷引鵲聲新報喜賢郎歸自鳳池頭

贈金川謝世拙

機巧紛紜總失真君家三代葛天民
從無羅綺頻誇世薄有田園可贍身
狡兔漫勞營窟苦鴟鳩終是托巢馴
年年瓜果蛛絲宴任賜靈光與別鄰

攜子姪遊越泥山

十里山浮海際煙登臨許我獨當先
波心竹樹渾無地鰲頂樓臺別有天
古壠徒勞尋柳絮荒祠今喜見桑田
潮平歸路還泥濘驅石空聞方士鞭

聞兩廣捷音

嶺表頻年羽檄飛俄驚萬里振天威
渡瀘重見運籌易降越猶疑賜璽非
炎海風清馳露布蒼梧雲淨卷征衣
高秋尚念平南士瘴雨蠻煙奏凱歸

楊震却金圖

許由遠逝夷齊已寂寞千古無廉士
遂使毛詩賦蒼蠅起應春秋誚封豕
吁嗟三代尚如此羸秦炎漢何足齒
因君莫夜却金事欵段羣中駭駮駟
何世亦有關西楊芳名炳炳昭青史
當時劉愷讓國逃鄧彪推侯與從弟
東都歷歷

亦數人何獨千年美伯起曠視形跡間崑玉砥礪亦相似
細論精微處差却毫釐隔千里也曾激衆碎連城不免失
聲因破釜也曾揮却白腋裘拾簪田野欣然喜好名好利
亦相因矯衆由來近奸詭君子觀人在隱微豈事昭昭眩
人耳我思王密餽金時天昏地黑無人覘胷中義氣摩青
旻視金如視塵與滓嚴霜不到六月寒澄潭不見千尺底
碧漢無雲秋月孤冰堅不耐應難比當時漢室已傾頽阿
母榮兒競淫侈胡椒八百斛他物亦稱是懷金豈但在黃
昏白日公然受馬趾樊豐劉護肆貪恠橫索民錢門如市
從來氣味各薰蕕清眼安能視貪鄙今日上疏除酷驥明
日上疏斥奸雉此心亦獨天地知世人不察徒爲爾豈特
君不知故人當時知震亦有幾喪前悲烏高丈餘奸邪如
見應含恥趙清獻公包孝肅後先相繼並馳美神遊八極
駕風霆曠世相逢悅知己嗚呼斯人不可作彷彿丹青圖
畫裏畫圖畫形難畫心我欲滌筆秋江水描起一片鐵石
心用激世間貪墨子

擬御製勸農歌

四方皆天職嗟農獨苦辛所以古哲王巡省及茲辰簫鼓
吹豳頌訓迪良諄諄東郊土脉動好鳥鳴芳春桑鳩拂其
羽催耕一何頻乘時播嘉種原隰何勻勻念茲民所天珠
玉安足珍一日苟不作飢寒將立臻勿恤沾體勞但憂年
歲屯沾體勞尚可歲屯傷我民憶昔先皇時端居軫郊闡

黃氏據殘集
載歌憫農咏丕揚列祖仁禁苑籍千畝雨暘雩百神玉食
豈不足貴令四海均九重尚結念况爾謀其身古人有良
言歲計在于寅豈伊公家賦父子亦以親春風正發育萬
物皆鮮新勉矣東作力佇看西成禮

文

經筵日講論用人疏

善用人者必有以定天下之志亦必有以作天下之氣用
人必以次耶則人將有怠惰廢弛之患不以次耶則人將
有覬覦非望之心善用人者必出於常亦或不出於常出
於常者法也所以定天下之志也不出於常者法外意也
所以作天下之氣也知此者可以任用人之責乎夫國家

用人惟賢是取才取其集事也德取其鎮俗也此易曉也
彼資格何爲者哉積日以爲勞積勞以爲最日月旣足不
肖亦遷日月未及雖賢不與蓋自崔亮作之於魏裴光庭
成之於唐至於今中經英君賢相不知凡幾而卒不能去
之何也則其法亦有不可去者耳知人之難自古患之是
非君相有知人之明朝廷有責實之政以名譽取人或失
之浮以功效取人或失之詐取人以賢才則人孰不曰我
才也我賢也若夫資格有籍可按故奸僞易防有迹可求
則讒謗易杜是豈特崔亮光庭二子之爲哉董仲舒云累
日以取貴積久以致官則漢時蓋有之矣周禮以德詔爵
以功詔祿以久奠食則周官亦有之矣但不若後世之弊

耳然則資格者欲遽廢之雖主上聖明殆不可也欲專用之亦不可也宋寇準拒進簿之吏范仲淹革磨勘之法當時不便二公亦不得久安於位則資格亦未易去也然臣以爲秉天下之公持天下之法用天下之人此大臣宰相之事而何惜乎人之言哉夫同一資格也司馬光用之而善常袞用之而不善崔祐甫不用而善王安石不用而不善則法豈有定哉使其明且公耶用可也不用亦可也其或不然用不可也不用亦不可也統論之資格者所以待常流不次者所以待非常之士資格者有司之事不泥於資格者大臣宰相之事也

皇明開國功臣錄序

皇明之興高皇帝以神靈睿聖不階尺土而統一海宇再造華夏帝王之烈於斯爲盛於時文武之士崛起淮泗翼奉輦轂運籌發蹤攻城野戰之功不可勝紀傳至於今蓋百三十餘年諸顯融特著者已載在人耳目不朽其或未封先逝或功高過大卒以相掩雖其子孫有不得知其祖考之迹况他人乎夫食粟思稷踐土思禹君子謂之知本今吾承平之人去鱗介之陋以卽冠裳之懿庸非諸公之賜耶孔子曰微管仲吾其被髮左衽矣所以昭前功也矧知道之士生於其鄉顧聽其泯泯而已哉定遠黃君良貴生於龍飛之鄉及諸公餘澤未斬之際慨然有作攜撫蒐羅發微抉隱叅以往籍輯爲一書自徐魏公至指揮李觀

凡得若干人爲錄若干卷履歷緒業一覽而盡將以傳域中而慰地下可謂知本者矣昔炎漢之初蕭曹張韓之功非不偉然大也非司馬氏述而傳之於武帝之世其後班固之史何所考焉蓋紀事之籍近則詳而實遠則略而失真愈遠愈失其蔽也罔然則黃君之作所謂近而詳者也夫其可少乎他日有班固氏作而求遷史者吾知其必是書也君名金登甲辰進士歷官吏部郎中廣西藩叅致仕此其家食時所修可以觀其志矣并著以考

附東閣私抄序

文煥

東閣私抄者何私錄所聞於陽明夫子者也以東閣名者何館夫子之東閣也某自嘉靖戊申夫子以書禮聘置家

塾授子正憲經於是乎館也某循弟子禮於夫子之門牆舊矣茲正憲承夫子命復與某爲師弟稱某之教正憲卽夫子所教者也夫子所以教某某已教正憲矣錄之者何爲志不忘也且爲後世計也或曰夫子之教吾子者聖賢之學也夫子命吾子教正憲者科舉之文也教聖賢之學以明正道教科舉之文以遵王制事殊致異豈得以夫子之教吾子教正憲也某曰不然自聖賢之學不講而科舉之習興俗儒遂日二學爲兩途詎知我國家創制立法黜邪崇正因科舉之文明聖賢之學其深於聖賢之學者發爲科舉之文又大過人焉師非是無以教弟子非是無以學茲錄其可已耶况四方諸友遊夫子之門者北燕南越

動隔數千里經年獲甫至每晨一謁林立充庭絡繹進退
一日間侍教僅一二刻來門數月又將別去雖有所得皆
隨問隨答如飲河者適充其量而止其所未及聞者多多
也豈得如某朝夕坐春風中而得盡於警欬更復晨昏獨
見有諸友未及聞而某獨聞之者乎某弗錄則夫子之微
辭妙旨將有散而弗存湮而弗彰者矣錄其可已耶第某
有老母弗免往來作輟夫子以德業名世方將大用於朝
恐不能久侍臯比以竟某之愚衷爲念爾因書首以白於
同志

道南先生集序

道南先生諱韶字九成家貧爲小吏給事於藩司藩司嘗
夜出聞吏舍讀書聲甚苦問之乃先生也試以經義奇之
值天順己卯鄉試引入試院遂中式成化五年登進士第
授南京大理寺左評事歷左寺副右寺正陞江西按察司
僉事署學使者事致仕先生所交多才士華亭張東海東
吳桑民懌皆爲賦其所居之景而先生之詩文質而不華
有古承平作者之風然家集散失亦無從究其底蘊所存
詩數首又雜徐曰仁之作某因刪去取文翰大成所選律
詩七首合之以爲茲集嘗見同邑魏嘗齋集與先生唱和
甚多今亦失去不得取而附之七世族孫宗義識

道南八景詩序

浙之餘姚治南十里地曰古路路之南今江西僉憲黃君
九成世居之故君自號道南居士其所居之北七里舊有
通德門鄉人出入孝友德義習以成俗其視鄭公通德之
門何異門之南舊有招賢里士大夫聚止之地衣冠文物
於斯爲盛其視荀氏高陽之里何殊居之東南約半里有
橋名隱鶴橋上通溪澗下輸江海湛然空碧環遶左右其
一水護田將綠遶之謂歟居之西南約二里許有嶺名雙
鴈嶺高摩蒼漢俯瞰長溪藹然青翠映接軒戶其兩山排
闥送青來之謂也東有丁山一泉甘寒甚潔足以供黃氏
朝夕之需北有浦流九曲盤旋黃氏之居而若不容舍者

此尤鄭與高陽之所未有也君未第時讀書處有巨槐乃先世所植綠陰覆屋人以王氏之三槐擬之屋後有園園有桂數株秋香滿戶及君秀發鄉闈人又况以郊林一枝此又槐屋春陰桂林秋色之所由名也君上春官以禮經魁天下士今列官憲伯崇階未艾皆山水鍾秀所謂地靈人傑君不能忘所自分爲八題各賦以詩而又求諸縉紳先生歌詠之總僉其楣曰道南八景示余且屬余序嗟夫人稟山川清淑以生山川亦以人文而顯柳子謂地得其人則山若增而高水若闢而廣人得其地攄幽發粹則文宜益峻道宜益修交相贊者也然往往不相遭值或相遭矣而又際非其時是以光嶽氣漓人材罕出景物蔽翳今君居得其地稟得其清而又遭際聖明休養生息俾得以世守先業服習詩書起家科第歷官中外公餘燕休揚英吐華歌詠奇勝而圖維報稱將來之位望愈隆聲名愈盛閭里增光則千載之下寧不有因君之作慕君之風而低回歆羨道南之景者哉是則地以人勝君其有之惜余文不柳若不足以表暴然君之人文自足顯矣姑爲之序成化十五年歲己亥冬十月旣望賜進士出身嘉議大夫南京吏部右侍郎前翰林院侍讀學士兼經筵講官同修國史秦和尹直正言書

道南先生集

詩

石枰遺跡

謝相安晉機不出一枰外今日渺何之東山跡猶在

閒居

家住碧雲間幽深似考槃澗波春泛綠松翠夏生寒舉酒
臨風酌援琴就石彈自然成野趣不是懶爲官

登龍山

旭日煙消平野靜尋幽偏愛踏芳晨靈泉龍蟄秋難雨仙
井丹飛人自春松竹蕭蕭風露迴水雲渺渺海天均下方
薨棟爭新日絕頂孤亭祀漢人

友梅

歲晚江南競吐芳天然清契兩難忘風霜共守形骸老冰
雪相資意味長謾說幽探曾踐迹翻令潛化不聞香笑他
知己徒爭媚得似同心惟向陽

題徐處士梅月軒

水邊籬落路迢迢坐見冰輪上碧霄生意一枝嘗獨占清
光萬里不須邀山河有影秋清淺雲漢無聲夜寂寥可是
南州高士宅至今留得此風標

綠猗書屋爲方僉憲大本題

一室蕭然竹萬枝虚心觀理正相宜眼空截管窺天處力
壯爲竿釣海時向暖偏逢南日照耐寒何怕北風吹鳳儀

曾協簫韶曲不但長歌衛武詩

赤嶺龍湫

龍在于淵耀厥靈水清上赤更精明神通天上發揚氣妙
應人間祈禱情雷逐風時聲若吼雲行雨處勢猶傾信知
變化無窮盡聖主尊臨樂太平

拳石廻瀾

力挽頽波得所歸中流驚見石巍巍蟻封甘讓高千尺蛙
坎能同大百圍聲徹雷門時變合勢分天柱亦依稀狀元
自應魁星後萬古斯文日月輝

屏山擁翠

山列如屏鎮一鄉四時蒼翠共徜徉氤氳不借春風煖潤

黃氏攬殘集
澤曾兼夏雨涼清挾水光將輔月寒凝露氣或成霜俗塵
此外更無染景與心融趣轉長

自題所居梅月軒

待月南樓月正明老梅見月倍縱橫名魁花木百千狀數
合乾坤三五盈味入調羹期大用聲聞搗藥悟長生徘徊
香影題詩處一點清光不世情

道南八景

通德高門

黃 韶

誰築于公門古來稱通德近喜鄉中民德誼頗成俗出入
常相友往來無雜客永教子與孫心田勤種植

和

同邑魏瀚

通德南頭路招賢舊日門文風今獨盛形勝古猶存龐
士稱高隱于公有令孫百年誰繼美九棘下天恩

寧德林 聰

門倚長衢四望通沛然德教與民同升堂入室皆由此
比屋將成鄒魯風

淮南蔣 誼

誰將一寸木可以高岑樓卓然苦莫矜何如賢者由昔
稱鄭公鄉黃氏能比述垂楊盈古路高門敞遐陬憧憧
日往來衣冠競趨樞空嗟狹路間幾多公與侯

華亭張 弼

彷彿鄭公鄉宛見于公宅好刻玉川銘望望來三益

新淦蕭子鵬

達聰明日開靈府分於交達置安土如今天下可同人
不必深局與環堵

同邑邵 曦

舜城南去路非賒通德鄉中第一家數仞高門連里巷
幾多喬木蔭桑麻尋詩每集耆英杖問道常停使客槎
地本有靈人毓秀顯揚今已錫褒嘉

吳興張 淵

閎哉仁里門崢嶸若雲觀千載樹綽楔永表君子閭姚
江古虞國淳風今未散况兹化頑埴民彝宜旦旦衣冠
盛鄒魯禮樂隆周漢賸彼鄭公鄉么麼奚足算過者必

式之可以激庸懦

東吳桑 悅

高楔凌空命飛翥霞光山色為丹雘舊業曾培王謝基
天恩新賁崔盧柱直入宮牆是廣居功名回首白雲虛
却嫌千古傳佳話遮莫門容駟馬車

招賢舊里

黃 韶

故里招賢舊勤耕且業儒曾懸陳氏榻每式段千閭未聞
門有鳳肯謂缺無魚致士從今始長教人敞廬

和

魏 瀚

仁俗當年美賢名與世長絃歌藹盈耳冠蓋鬱相望亭
起徵賢聘車回勝母鄉行人重回首鳴鳳在朝陽

故里招賢賢自來相逢誰不羨多才當年若使昭王見
應把黃金此築臺

延寧邢簡

蔣誼

賢以禮爲羅相將自千里不聞黃金臺招賢從隗始試
問姚江濱斯名本誰起燕趙俗強橫吳楚風綺靡懸旌
日奔馳清風激人紀因思楚元王何不設酒醴

張弼

長笑燕昭臺黃金以驕士此地孚丹衷衣冠羣萃止

江東丁備

鄉閭歷千載遺此招賢君主人禮爲重黃金徒爾輕想

堪作東南第一橋

張弼

鶴橋俯澄江蛾眉青鏡裏照面不照心人心隔千里

蔣誼

春雨夜來足溪澗增春流依依垂楊柳風吹挽漁舟鶴
隱橋故存寒波掬清幽周廻湛空碧浮沉多沙鷗緬惟
天隨子洗耳誇許由臨流照素髮空懷千載憂

丁備

溪長波練練溪山互轟轟橋東有奇士身貴朝金屋舟
人此夜泊放歌山水綠

蕭子鵬

鶴隱高橋屹中住題柱僊郎幾人去溪流一碧終不渾
世世令人擬清渭

桑悅

百尺危橋假鶴名天高月冷兩無聲舊時題柱藥宮客
跨鶴萬里邀蓬瀛新碧粼粼俱剩水時有幽人來洗耳
蓮葉清風太乙翁桃花流水玄真子

鴈嶺來青

黃韶

鴈山當戶送青來戶外分明圖畫開和月有時浮几席挾
雲長日護樓臺曉分神氣通南鎮夜逐文光映上台自是
一般風景異却疑東去接蓬萊

和

魏瀚

是越困時屈膝見豪英

李迪

昔人於此集英賢遺跡猶存非浪傳詩詠南山人似玉
罇開北海酒如泉金臺恍惚崇燕土玉步依稀到渭邊
珍重相親在仁者所須珠履客三千

張淵

浙東富文獻今古恒不衰無乃山水靈所鍾麟鳳姿禮
義悅衆心絃誦喧四維粲粲束帛賁子子干旌來可以
慰蒼生豈顧小山詞冠蓋迭相望王謝仍在茲日日拔
其尤委巷空茅茨

桑悅

黃氏攬苑集
公卿薦士久不作此地舊有招賢名誰知燕臺一抔土
可直全齊七十城魏闕遙遙楚天碧滿眼白雲江水急
小山叢桂不聞歌秋空月冷黃金泣

鶴橋環碧

黃韶

鶴隱無形橋有形水流宛轉應平成試看月到波心處光
合源頭一點清

和

魏瀚

仙羽歸圓嶠浮梁掛碧溪碧天涵几席萍藻狎鳧鷖紫
電騰雲驥青蛟取月梯主人天上去砥柱尚留題

邢簡

隱鶴橋邊江水遙時時清氣逼層霄自從題柱成名後
羣峰插天表彷彿鴈來賓煙抹蛾眉淡雲籠黛色勻玄
暉時拄笏安石每攜春萬古青無了應憐白髮新

林聰

雙鴈山高當戶庭鴈飛相挾送遙青幾回欲染青爲筆
寫出吾心動靜形

張弼

鴈嶺聳雙青勢將飛入座相對每忘言浮雲自朝暮

丁備

千峰下返照空靄浮蔥蒼山齋聊容與拄笏意何長幽
人肯來顧共和淵明章

蔣誼

黃氏撰文集
峩峩雙鴈峰急走若儻揖雲容復雨態而不離几席長
松倚高寒溼蘚掩塵迹若人慕肥遯賁酒有求識野趣
日夕佳蔬筍充肉食何至米生狂瞿然拜頑石

蕭子鵬

鴈嶺高高作庭表佳氣蔥瓏徹昏曉岫雲昨日出爲霖
回首天南青未了

邵曦

鴈嶺差峩翠作堆畫堂常日待簾開峰巒不盡生成巧
天地無私自送來晴接稻畦濃易辨煖連麥隴混難猜
幾番對此陳瑤席分得清光落酒盃

丁山一泉

黃韶

丁山去家只一里山下出泉甘若醴辨水若教德裕嘗惠
泉第二應難比

和

魏瀚

山下流膏脂主人喜無寐偏消詩思渴能醒沉酣醉况
可喻道體淵源接洙泗孰云一體泉未足當時瑞

張弼

原泉混混來爲語道南士體道當孜孜道體本如是

邢簡

一山高嵯峨泉出山之坡况在古道傍取汲人如梭清
勝更無比銀河差可擬如逢玉川子七碗猶未已

邵曦

黃氏攬殘集
曾探仙踪到勝垓天光雲影鑑初開寒同玉露甘于蜜
澄擬銀潢絕點埃長日煮茗消暑渴清霄浸月盡餘盃
源頭活潑憑誰濬疑是平分洙泗來

桑悅

白山南去有丁山山中有泉流瓊漿接筒何事人工巧
擊壤聞歌世澤長博濟未輸毛粟義流芳不減醴泉香
品題將附江心水猶慮山人未肯降

蔣誼

一脉涓涓甘似飴四時清味沁詩脾靜深有本原坤體
晝夜無停顯道機寒浸玉鈎新月上光浮錦綺夕陽時
道人曾次清如許坐對屏山看採芝

沙浦九曲

黃韶

林下數椽茅屋雨餘幾曲潺潺隔水紅塵不到扁舟時自
往還

和

魏瀚

開軒有奇觀遠墅連小浦回流如眷戀宛轉不可數清
秋涵皓月盛夏薄煩暑爽氣日夕來手版奚用挂

張弼

水似九廻腸人如六一子永結君子交長教淡如水

邵曦

沙浦迢迢出鴈山鴈溪分注海門長一灣映帶招賢里
九曲滌洄古路鄉楊柳雨餘鶯語潤桃花浪煖鴨頭光

黃氏攬殘集
溶溶漾漾衣堪染幾送漁舟在夕陽

李迪

繞舍廣腴畝阡陌久已開南山一夕雨北浦九重洄漑
潤固無私滄若黃雲堆秋風穰穰時社鼓喧如雷

桑悅

一溪東去遶重重兩岸潮平走白龍甲第宮牆新氣象
招賢仁里舊家風秋來鳧鴈和雲落春到蛟鱗待雨通
時聽滄浪歌一曲濯纓濯足儘而翁

蔣誼

一帶清流東復西化工寫就草玄之潮吞湖海如腸灌
地湧沙洲似橐墟出沒漁翁堪寄泊往來客棹往稽遲

主人意興多忘物致曲工夫總在茲

槐屋春陰

黃韶

幾間書屋傍槐陰坐對春風閱古今記得當年秋試日花
黃催我掇科心

和

魏瀚

書屋脩青嶂高槐蔽綠陰屯雲不着暑映月似垂金解
道詩人趣能忙舉子心近來南省裏絲竹夜聞音

林聰

曾聞槐市貨諸生又見槐堂位列卿豈若道人槐樹下
春陰日日自敷榮

蔣誼

春風吹槐蠶墮我書屋傍枝葉連羅織春陰故無傷晴
窓列經史志在逢明良吁嗟楊子雲執戟終何妨自揆
騅不逝跌足奸諛場晝永惜寸晷眼望槐花黃

丁 備

西齋槐陰滿披卷當前楹銅爐燒柏子悠然有餘情忽
爾發浩歌起自溪塘行

張 淵

庭前有古槐爰自先人植累世種其秀造化加靈澤于
時春服成東風付顏色陰陰欲滿窓青雲護書帙衆鳥
相嚶鳴于焉共休息及茲秋華黃登天挾長策聽訟在
其下撫景念疇昔王公固何人可以踵前跡

桑 悅

茅屋數間書滿几庭內槐陰清如水詩成兩腋生清風
天際閒雲飛不起黃門厚德世所無種槐亦與三公符
立言壽槐蔭千古後學誰擬蘇東坡

黃 韶

桂林秋色

八景天然得趣賒况逢世道正亨嘉時人欲問此何處便
是道南居士家

和

魏 瀚

小山邊古路秋色正芬芳幾樹邠林種一枝蟾窟香綠
陰澄玉宇金粟映霞觴彷彿來仙子乘風入帝鄉

邢 簡

種桂成林自吐芳能紅能白又能黃看花君子多陰德
不減燕山竇十郎

丁 儻

天香灑六合古榦霜雪飽步蟾羨奇才直上天門杳杳
消有時散芳名永蒼昊

蔣 誼

老桂飄古香人疑月中落月本陰氣凝誰云七寶合更
舉一癡兒鉛刀豈能斫所志果益堅東海亦堪涸古云
豪傑士不待文王作見君始信之硬語盤寥廓

張 淵

芳本天上移鬱爲巖下秋接葉團綠雲老榦蟠蒼蚪婆
娑明月影似礙銀潢流西風古天香吹滿十二樓緯彼
雲中仙飄飄蟾窟遊高擬最上枝文采驚凡眸願爲當
世英永藉無疆休

邵 曦

羨君曾向月宮回分得仙根此地栽萬斛天香攜袖至
一庭秋色逐人來玉柯挺挺依雲立金粟纍纍帶露開
始信攀援有家學雲衲還擬占高魁

桑 悅

仙種移來廣寒府老榦懸崖秋色古昆明有鳥從何來
辟寒盡向枝頭吐聞說天門似海寬瓊林玉宇不勝寒
誰人解得叅禪意留得香名萬古看

半山先生集序

唐多詩人颺扇波委卽偏方下邑幺絃孤韻亦瞥入簡牘而吾姚江自虞永興以外寂寥無聞焉且永興又隋氏之遺也以唐詩人之多姚江人物之衆而單聯隻句不能分有唐之一數豈其風雅道衰地土使然邪抑窮山海島傳之不能廣邪不然在當時未嘗不繕寫摹勒流傳人口久而遂至失落邪羲讀家集至半山先生詩而有感焉先生諱嘉仁父翊字九霄九霄善近體詩書法趙松雪畫竹石菊花尤入神品今其詩失落而半山之詩尚存十之一緣情綺靡之功聲勢物景能感動人使其載之唐詩紀事中故亦嫣然秀出者也而屈抑於諸生以死其時中原少年

之相倣效競作新詞自謂何李詩體一經品題姓名便不
寂莫先生與一二窮退無力之徒唱之而未必能和和之
而竟亦莫能解也安望其傳之之廣乎某閱本朝文集唯
正德間摹勒最工卷軸繇多此皆得勢者所爲先生有作
脫口之後書之故紙題之敗壁其繕寫亦一過再過而已
在當時已如此又何待久而失落乎由先生父子言之百
年之間父老見聞猶在已同鳥鳴花發歸於泯滅況有唐
千年之遠邪則姚江無一詩人之傳者非其風雅道衰亦
可知矣雖然自先生以來姚江之爲富貴者何限亦有子
孫守其遺集裝潢投贈偶揭一二版便嘔噓棄去以充糊
壁覆甌之用者不少矣曾有如先生見之殘編欣賞而讀
之讀之而唯恐其盡否也族孫宗義識

半山先生集

詩

山行

山轉路盤盤行吟興不闌壑龍懸怪木巖雪瀉鳴湍境與人間別身疑畫裏看隔林樵唱起空翠暮生寒

述懷

萬物榮枯得細評盈虛有數見分明窮將入骨心猶壯老倦趨時夢亦清詩壓尋常騷客句題留江海散人名逍遙壁立羲皇上兩眼從渠白與青

秋夜述懷

明月蘆花合作秋夜深人靜思悠悠清砧擣碎一牀夢短

笛吹來萬斛愁酒易欺人紅上臉雪難饒我白盈頭江山
莫笑行人老行盡江山老未休

春日卽事

權入東君一歲華又徵吟料付詩家梯山有脚雲將雨繡
地無名草自花風遞笙歌淡院鳥月明鼓吹小塘蛙何時
載酒東郊上收拾乾坤春意賒

西湖圖次韻

西出錢塘數里遙路通竹徑晚蕭蕭山當好處儘多寺地
到斷頭方有橋詞客往來尋舊迹老僧相對話前朝予今
足躡青雲上回首白雲不可招

花朝小酌有懷

春深客思倍淒涼慙媿流年已二霜對酒易爲今日樂看
花猶記少年狂乾坤白髮詩愁在風雨青山客夢長惆悵
故人成契闊歸飛空望雁行行

和李義山無題四首

輦路香塵失舊蹤促妝慵聽景陽鐘芳心似水朝宗急幽
恨如絲著雨濃春圃自應憐芍藥秋江誰與采芙蓉劉郎
莫歎蓬山遠只在湘簾第幾重

竹外羊車夜不來歌鐘何處殷春雷五更殘夢時相接一
寸柔腸日幾迴紅拂有情知愛客綠珠誰識解憐才蓮房
老盡蓮心在肯與秋風化作灰

楚水迢迢會晤難更堪多病怯春殘杜鵑啼老紅猶溼精

黃氏撰錄集
衛情深海欲乾半壁輕煙蘭葉暗一簾疎雨杏花寒可憐
織就迴文錦不得夫君帶笑看
塵埃無扇蔽西風望望蓬萊弱水東謾道花深無路入却
憐藕斷有絲通青銅羞對雙蛾綠絲筆慵題一葉紅十二
闌干閒倚徧不將瑤瑟怨飄蓬

迴文二首

天倚青山一戶開綠苔生地絕塵埃先春報柳藏鶯早晚
歲栖松有鶴來賢聖對時書滿架主賓歡處酒盈杯年年
度盡忘名利煙外溪山新柳栽

山外郊遊記品題雨過春柳隔鶯啼寒消草野新生發暖
逼花林半整齊斑竹亂圍山角寺翠松高臥石頭溪還思
倦客歸途晚閒鳥棲時紅日西

九日客懷

烏帽斜敲白髮侵老來空憶舊登臨一枝香菊西風淚數
畝荒苔故國心梧撼秋聲庭露冷雁傳寒信塞雲深不須
貰酒酬佳節只把陶詩細細吟

遊寺

晚向漁磯繫短篷尋幽深入翠微中苔裊展綠連朝雨松
粉飄黃昨夜風十里桑麻農父宅數聲鐘磬梵王宮醉來
欲覓禪單臥誰舉聞聲三日聾

月夜登樓

玉宇澄清暮靄收吟情突兀自登樓寒蟾千里夜如晝新

雁一聲天欲秋湖海誰青豪傑眼風霜易白少年頭更殘
忽聽荒城角吹老梅花總是愁

悼史姪婿

締結絲蘿仗義深華峰忽墜勢難禁雲空滄海龍歸遠月
冷丹山鳳斷吟白玉忽埋三尺土青燈空照萬年心招魂
賦就情如割血淚滂沱灑墓林

寓襄陽鐵佛寺

菊老窮途歎陸沉病依鐵佛伴幽林松風響榻驚秋客蘿
月窺窗識破衾愁思與霜生曉鬢雁聲雜杵碎歸心懷人
忽憶十年舊倚杖看山費苦吟

送別

襄山遠寂莫漢水波清漾一片別離情盡在河梁上

卽事

籬落西風野老家閒看景物感年華柳衰荷盡芙蓉老交
割秋光與菊花

述懷

年年春暮客天涯愁見東風颺柳花自歎身如梁上燕營
巢長傍別人家

秋曉

木葉蕭蕭欲脫柯紙窗殘月影婆娑西風也不從公道破
屋人家分外多

田家

煙拖豔色入蓬窗一畝平田隔草塘暮雨初收新水滿藕
花香雜稻花香

懷友

聽雨思君淚欲流簷前滴老鬢邊秋何時過我孤窗下共
話思君聽雨愁

見雁

滿眼西風憶故廬親朋音問久相疎年年江上無情鳥只
帶秋歸不帶書

夜窗

香篆煙銷夜欲闌硯池冰結漏聲寒梅花影戀書窗上應
得詩人帶月看

芙蓉

芙蓉一帶繞池塘萬綠叢中簇豔妝錯認園林花似錦不
知葉底有風霜

黃氏攜殘集

遺獻公攜殘

寓雲間姪炳付梓男百家募校

潁州集

潁州公諱嘉愛字懋仁別號鶴溪九霄先生之子也正德
 戊辰進士知潁州改欽州卒官公從王文成公講學抱負
 不凡而左官萬里鬱鬱不得志其弟半山挽之詩云鳳翔
 天上九苞高文彩呈祥冠俊豪青海三年遭宦謫白頭雙
 淚倚門勞日沉霄漢光芒掩雲鎖山川怨氣饒老我惠連
 情似海離騷空賦對誰招訃回萬里禍雙雙鳳去雛隨痛
 天亡半紙浮名真幻夢三春玉樹忽重霜神遊老瘴終辭
 廣魂逐孤雲始返杭骨月一家三苦處西風泣斷幾肝腸

六世族孫宗義識

潁州集

詩

五河舟中二首

行役年來總未寧
數莖白髮鏡中生
年華虛自過強仕
世道憑誰致太平
千里家山清夢遠
百年道統此心縈
蓬窗獨倚興懷感
浮世功名一葉輕
浮世功名一葉輕
壯懷耿耿日星明
文章自荷逢明主
道學還期覺後生
三載潁州徒竊祿
百年塵世是虛名
何時績最朝丹闕
快奮鵬搏萬里程

南安旅館

旅館清宵獨坐時
幽懷默默是誰知
一生報國心猶缺
萬

里思親鬢欲絲海北謾言非善地嶺南自信有前期只今
聖代多恩澤未許明珠滄海遺

至欽州作

謫官萬里至天涯心事紛紛亂若麻毒霧障天迷海嶠蠻
煙滿目隱邨家迂儒素乏安邊策絕域應多泛海槎試倚
危闌看北極清光依舊照中華

憶親

東望家山路八千音書恨乏雁魚傳高堂白髮添雙鬢客
舍青春又一年定省只今成放曠懷思鎮日苦縈牽何時
晝錦歸寧便獨向華堂啓壽筵

懷遠舟中

畫船東下任從容江樹迎風望裏紅王事獨勞行處有漁
歌相應聽來同山沉遠水排雲外月白旅人入帳中俯仰
乾坤興感慨濟川長抱此心雄

書懷

自歎年華四十餘功名蹭蹬竟何如六年郡治渾無補百
畝田工久欲蕪老向南陲眠瘴雨生還北闕問神巫天涯
脈脈增惆悵吟對書齋夜月孤

憶兄

弟在天涯兄在家相思兩地重興嗟到來深怪山川隔別
後俄驚歲月賒何日茱萸同插鬢當年荆樹正開花幾回
夢覺池塘夜吟對虛堂月未斜

憶弟

中年謫宦向邊方每憶連枝在故鄉一度春光如撚紙幾
回夜雨夢連牀蠻雲漠漠常昏晝白草荒荒不上塘別賦
吟完還恨賦孤燈坐對夜偏長

有感

悶懷百種共誰言坐對孤窗近午天千里民夷猶雜處一
生力命念當然小臣憂國瞻天遠拙宦何心便世爭似
投簪還故里黃花白酒共周旋

文

燕思堂記

潁川公堂之後舊有堂三楹歲久將壓而且逼窄一日州
之父老來請曰是堂不稱宜更爲之余難之曰君子爲政
以懽民財力爲先而不求自逸必欲從爾言於自安則便
矣其如勞費何僉曰不然宮室之作所以臨民而壯威重
非徒專爲自安計也且此堂不日將有傾頽之患及今爲
之則材木斃斃之類猶有可用而工力且可因之以少減
省釋今不爲則其勞費將必有倍今日而不容於不爲者
惟明府其圖之余因然之乃相基定制鳩工聚材經始於
歲辛未五月之吉而畢工於其年八月之十五日輪奐更
新規模宏遠比於舊制微有加焉其日鄉士大夫與其吏
民皆忻然相率而來以與余共落之旣又請曰堂旣成矣
不可以無名余因名之曰燕思且爲之說曰牧民之道亦

多端矣然燕居之時不先有以思之則臨事之際必不能
有以處之是堂之作將爲牧民者宴息之所也夫豈徒自
爲偷惰之計哉其必觸目興思因名思義雖在燕閒之時
常存儼若之念民生則思遂之民俗則思善之民患則思
去之以至武備之當修鬼神之當享民用之當節民力之
當寬與凡民牧之所當務者莫不於此焉思之而弗得有
弗措焉則見諸行事將各盡其則而我之責亦庶乎可以
少塞矣易曰君子思不出其位詩曰職思其居孟子之論
伊尹亦曰思天下之民匹夫匹婦有不與被堯舜之澤者
若己推而納諸溝中皆以此也雖然行遠自邇登高自卑
而所以爲之豈無本邪中庸曰君子不可以不修身朱先
生之所謂近思也近思旣得其於爲政治民不過舉而措
之耳余雖不敏請從事於斯

丁山先生集序

丁山先生諱元釜祕圖山人楊珂壽之曰邃壑之璞鍊鑿弗能加焉人知其爲壽也而不知其珍瑜匿璨藏之深也遼海之鶴彈弋弗能及焉人知其爲壽也而不知其翱翔獍翻舉之遠也鬼崖松柏多歷年所而大匠無所庸其斲焉人知其爲壽也而不知其澆霏霜霰勿爲改柯易葉性之定也我姚丁山黃公今年陟於八秩人咸謂將與璞鶴松柏同壽也而公之所以受壽也何居君子曰壽之爲言猶讎也天與其自行可久之道者其壽讎於久不自行其可久之道者其壽讎於不久久與不久之精亦各讎其生平之所行是故行其道者人也而非天之所能私也讎以

壽者天也而非人之所能必也天人交至余於丁山公之壽稽焉公少業儒博洽經史是厚於積也而能克黜矜吝自處若愚公四子河汶有聲庠序沂亦力舉子業是將顯於用也而能知義安命視富貴得不得若浮雲迨其老也種菊和陶毀譽寵辱無得而加年躋八秩猶讀書常若不足惟自處若愚藏之深也惟浮雲富貴是舉之遠也惟耄而好學是性之定也惟其性之定舉之遠藏之深也是公與璞鶴松柏同其養也惟與璞鶴松柏同其養是公固與璞鶴松柏同其壽也與璞鶴松柏同其養也公之盡夫人也與璞鶴松柏同其壽也公之得乎天也人行其可久之道天讎以可久之壽嘻若丁山公者夫豈適然之遇邪或

曰公嘗學於陽明先師年來又喜談坐功則今之所以永命也有奇術焉余曰不然公之壽子所得而知也公之所以受壽余所得而言也若夫事有出於天人之外者則非子可得而知余可得而言也嘉靖己未秋八月望前二日

丁山先生集

詩

幽居

屋頭山隱隱屋下水粼粼
釣月垂綸久看雲得句
新客來猶問路花發始知春
自是忘名利非關樂隱淪

自訟

長媿虛生天地間
良知未致學偷閒
文章不願追韓柳
樂處尋思到孔顏
塞馬也應無得失
海鷗何必有機關
從教修短都歸數
一任星霜兩鬢斑

睡起

風自南來坐北堂
一聲長嘯百憂忘
貧居我亦非無樂
病

間誰能不有忙午帳蝶翻春草夢淺塘魚戲夏蓮香苦茗
呼汲寒泉煮七椀何須待客嘗

遊西愚陳公園

步人名園歷徧時幾多妝點盡爭奇八隅風景逼真畫四
面亭臺近體詩水閣高頭畱月住洞門低處鎖雲移知公
後樂超塵俗柳氏愚溪未許齊

訪魏四山畱宿聞虎

昔年借榻契何深媿我重來雪滿簪夜靜忽聞山虎嘯晨
清還聽蟄龍吟千層雲合迷仙洞九曲溪回繞石林分付
劉郎告歸處再來須記去時岑

琴

臨風彈古調鸞鶴和清音爭似柴桑老趣在無絃琴

題扇

古樹臨流半夕陽得魚酷酒正相將一篙未盡波心渡回
首西風雁數行

鵲鴿圖

風動殘蘆水滿汀敗荷秋色思溟溟世人只說鴛鴦好誰
向春原念鵲鴿

次錢塘廻文

潮平兩岸拍天傾浪滾紅毬映日明橋小上堪乘馬瘦石
奇下可溜泉清迢迢路繞煙邨晚拂拂風生野樹晴遙處
幾多頻著眼利名爭逐亂帆輕

景州集序

公諱尚質別號醒泉先生吾始祖鶴山公之十三世孫也
嘉靖己酉舉於鄉知息縣事陞景州守修董仲舒書院改
周亞夫祠皆自爲文記之隆慶元年致仕所著有青園錄
詩近千首義存其十之一以官名之曰景州詩集序曰若
景州公者乃可謂之詩人矣夫詩以道性情自高廷禮以
來主張聲調而人之性情亡矣然使其說之足以勝天下
者亦由天下之性情汨沒於紛華污惑之往來浮而易動
聲調者浮物也故能挾之而去是非無性情也其性情不
過如是而止若是者不可謂之詩人若周伯弼之注三體
詩也以景爲實以意爲虛此可論常人之詩而不可以論

詩人之詩詩人萃天地之清氣以月露風雲花鳥爲其性情其景與意不可分也月露風雲花鳥之在天地間俄頃滅沒而詩人能結之不散常人未嘗不有月露風雲花鳥之詠非其性情極雕繪而不能親也景州之詩咽嚅於冷汰纏緜於綺靡江濱山畔至今性情恍然猶在其斯謂之詩人之詩乎某嘗輯姚江逸詩千年以來稱詩者無慮百人而其爲詩人者三人而已宋高菊磻明宋無逸及景州是也菊磻之詩僅見之詩話武林舊事者不過十餘首無逸詩集久湮某從其後人鈔之以傳景州當時詩畫與楊祕圖齊名祕圖詩旣散失而景州亦無有明其能詩者異時諸老先生論姚江之詩盛稱陳太常贊馮雪湖蘭兩人

太常之和唐音未免一時氣習雪湖與謝文正唱和險韻與文正伯仲擬古樂府不及西涯雖各有長處要俱不可謂之詩人也顧他年有定姚江詩派者菊磻爲詩祖景州則又爲吾黃氏之詩祖當不舍吾言而取定於前人矣族

孫宗羲識

菊磻之詩近高澹人先生搜刻有全本見寄此先遺獻昔年未及見之作

景州集

詩

初夏田家

四月邨邨布穀啼百忙農事競支持陌桑入夏和條剪園
竹過春帶筍移穉婦相春黃麥候兒童分餉綠秧時燈前
又作明朝計雨漫山田草未苗

丁未閏九日遊碧霞洞

千里雲通石徑斜洞門流水瀉金沙丹臺晚照明楓葉翠
壑秋風媚菊花境入深來多古跡山當奇處有仙家一年
九日難逢再宜把清尊倒碧霞

送張鳳埜之任江陰尉

把酒都亭折柳枝相看匹馬上春遠路從罨畫鶯聲劇門
對澄江蜃氣奇陳牒好藏張旭筆投金還索孟郊詩不妨
爲尉優詞學蘭菊由來有上知

秋日過石橋莊

邨居羸近故山青郭外移舟十里城秋雨池塘菱葉簇夕
陽籬落槿花明田家舊識供新釀鄰叟時過話野情便欲
著書楓閣小不妨隨地老虞卿

庚午中秋無月同望龍近龍二仲小敘西軒

西堂秋半桂花丹小有杯盤共二難忽作暮雲蒙淨宇旋
飛涼雨濕虛闌青燈里巷羸知己白首風塵喜罷官但得
百年長此醉未須明月一宵看

秋日同祕圖過四明訪馬魯原不遇

卜隱羨中散相過同右軍泉從松戶出路入石梁分林密
僅容月山高常礙雲主人尋藥去庭桂自紛紛

憶別

憶別江南忽暮春幾番風雨度花辰悲鶻處處啼相似何
事天涯聽更真

過楊祕圖宅露坐待月

北郭楊君宅青山對草堂滿牀書未整夾道樹無行詞賦
裁秋思杯盤聚晚涼醉餘還待月露濕芰荷裳

暮春六言二首

露濕丹藤蔓弱風搖紫楝花
餘報道明朝春去畱連庭院

黃昏

乳燕飛忙麥候哀
鵲啼老花晨一夜雨喧東閣數竿竹長
西鄰

富春舟中

秋晚開帆楓樹灣
舊吳風景有無間
平江雨歇新添水
隔岸雲分忽見山
十里客心紅葉亂
數家漁火白鷗閒
月明一繫嚴灘下
聽盡猿聲鬢欲斑

剡道

春霜明劔脊
曉發指盤瀧
峽口雲填白
峰頭日射紅
馬行蹲石上
舟下亂山中
自過清風嶺
谿花漸不同

留別陸陽山年丈

把酒注新愁
南江又晚秋
重陽連夜雨
千里未歸舟
砧杵山城上
芙蓉野水頭
明年晤都下
應在杏花稠

送新渠之南都

碧梧丹桂早
秋涼送客南
遊古建康
惆悵片帆歸
去遠數峰江上
自斜陽

早春同諸紫橋徐天池諸公集白馬峰之大夫堂

自媿山陰雪後船
喜從江閣共春筵
十年往事談新息

官汝上余數卷名圖見輞川
出王維白髮花前能繼燭青

雲座上有先鞭醉來欲覓西窗臥
笑指徐生榻未懸

天池
往事先

過孫霽峰書屋有感

黃氏攬殘集
先生歸去白雲間書屋依然在碧山石徑雨滋荒蔓合丹
臺風積落花斑春閒野鳥憑巢閣日暮鄰僧爲閉關十載
汝南同事客相過能不淚潸潸

海上歌聞淞之捷

海上誰興六月師旌旗閃電走妖魑因風爲報羣兇道製
鼓方臬王良皮

都市垂楊繫紫騮健兒酤酒上青樓雄懷一飲三千貫笑
指槍頭血髑髏

同孫石窗雨溪散步白雲寺

古寺雲林迴溪流石徑斜滿籬斑竹筍半壁紫藤花市遠
難酤酒僧貧足辦茶相看坐良久襟袖起青霞

睡起

睡起展圍屏山窗晚更清鶴行梧葉徑雀聚豆花棚滿地
流雲氣平闌射月明何妨憑石几閒聽煮茶聲

病起祕圖過山居有作次韻

臥病逢初夏日長真小年隔雲新買竹乘雨正分蓮山麓
鳴黃鳥溪橋環碧泉偶因尋藥出一笑得清賢

白雲寺次韻

一樽野寺三年約十里溪光九月來曲徑晴沙搖白菊古
碑遺篆見蒼苔天分蘿壁秋逾迴門掩松雲午未開醉臥
禪堂不歸去月明有夢到蓬萊

讀書筠泉山莊

繫棹清江訪紫霞橫經孤閣近南華靜看雲氣生松葉時
聽鶯聲出杏花石榻月明誰得句竹窗春永自烹茶山中
莫道無常業每抱龍泉洗澗沙

初夏邨居

寥寥邨落棟花時處處空林叫子規斑竹引鞭過別院綠
蘿延蔓徧東籬燕乘新霽成巢早蠶怯餘寒上箔遲一笑
龍山吟社裏短書來索夏初詩

過姚邨

十里山程晚煙邨樹影稠矮垣登吠犬委徑入耕牛石圃
秋黎熟溪田早稻收自憐南市客斜日竚芳丘

夏日喜還山居

一春多事淹城市五月山居喜復來屋角新陰生薜荔樹
頭時品熟楊梅呼童埽石仍攜簞對客分泉更洗杯幽鳥
似知逢舊主夕陽啼向獨松臺

秋日晴望

萬山晴雨正秋高獨倚江樓首重搔梧葉黃迷酤酒市蓼
花紅覆釣魚舫故人霄漢誰雙眼野客煙霞自二毛舊業
尚存松菊在不妨吟有句如陶

三溪道中

春水春山任馬蹄乍晴乍雨過三溪花從境僻尋常發鳥
向雲深自在啼先隴松楸青障裏舊家煙火翠林西
經徐
墓望泉得來詩句緣多忘隨記肩囊付小奚
木故居

春日同宋仲石望龍新渠北山龔莘野游花家山
扁舟日暖繫江沙小座清杯撲柳花野老冠裳便藉草莊
家兒女解供茶出林幽鳥迎人語起水時魚就地賒却笑
黃山競香社一番春事費喧譁

采茶女

女伴烏椎髻攜筐去采茶歸來笑相指都插杜鵑花

林居春曉祕圖過訪

淨業得林居春眠起較遲日華穿葦幕鶯語上花枝病後
頻辭酒愁中久廢詩喜君能見過爲剪北園葵

山館

山館鳥鳴春寂寂石爐香燼日遲遲道人睡起渾無事坐

向松陰改舊詩

過王右軍故宅

花時來訪右軍祠道是當年故宅基墨妙已無真迹在春
雲猶覆浴鵝池

閨怨二首

記別去時舟綠楊江水頭因知是歸路延望倚江樓思子
豈成怨逢人反帶羞強將妝自飾妝罷淚仍流

千里更行遠一年還復春寂寥零雨夜惆悵落花晨蒼月
照天海黃雲掩塞塵書來終未面翻厭寄書頻

聽松

寄迹玉華南茅堂近松嶼夜來風入松山童言是雨

過項氏園

綺樹閒春晝芳庭靜日華客來羣鳥散猶自落餘花

過徐鷺洲園看白鷗

十里松陰九曲灣桃花流水碧雲間相逢莫問風塵事且向西園看白鷗

鷺洲雨中送芍藥

雲谷誰能惜化工爲予帶雨剪春紅却嫌俗眼窺顏色自插金屏待曉風

野舟

一葉縱橫雪水間無羈常共野鷗閒南江新霽沙頭雨獨載詩人看晚山

閒詠

咫尺桃源不易尋且懷長劔紫雲深一春有句都刊竹時向林間逐首吟

三月三日集呂春卿大觀軒得簫字

中山結社臨元巳右史開軒近紫霄柳暗重城煙影澹鳥橫千嶂雨痕遙更從水曲移瑤席只在花深起洞簫庾信多才應有賦不妨明燭駐春宵

聽雨

山窗一夜雨點點正愁絕松葉擁瓦楞又令檐溜咽

積雨有懷社中諸公適葵陽寄龍山春社集次韻

苦雨經旬溼未乾有懷無地一追歡自持綠屣傷花落幾

對青燈坐夜闌野況百年常抱病林居五月尚畱寒元卿
偶寄龍山集得把春裁取次看

落花

天涯春已暮誰待惜飄零朝雨碧闌倚午風朱戶扃一番
穿院竹幾點入池萍容易絲華過西園柳自青

訪韋茗少叅歸自天台

偶聞使節天台返風雨黃昏叩竹軒相見未遑爲別敘一
窗燈火話桃源

松樂亭步月

臨湖山壑更連城萬樹松陰正月明有客雲居人不識却
於中夜自吹笙

紫陽山觀演武江上

大將旌旗壓陣寒六軍弓馬振江干道人已息封侯意猶
向峰頭倚石看

山窗

借得山中白雪窩自將遺稿費編摩偶因送客松門外黃
葉飛來几上多

秋暮過項園逢俞養沖

西風任倒白綸巾却傍深秋過玉津霜後黃花香自晚日
邊紅樹豔於春鳩啼竹塢如呼客鶴立松門不避人偶遇
同袍三載別相看驚歎二毛新

瀛門秋興

八首
存三

寂莫山城送落暉蕭條邨墅晚煙微滿林紅葉羣鴉落徧
地黃茅獨雉飛世歷清寒甘分薄自知迂放與時違芙蓉
開過秋江冷却憶吳門白鰕肥

寒雲漠漠海西頭搖落瀛門正暮秋風雨著書成渴病關
山吹笛動離愁漫誇仙子乘玄鶴真媿漁郎侶白鷗北望
氛煙猶未熄已聞歌舞滿皇州

聞道王師獲戰功捷書馳報五雲中龍荒鼓角鳴秋月雁
塞旌旗舞朔風放馬競嘶沙草碧歸人齊唱渚蓮紅明廷
已奏升平績好向西湖學釣翁

有客

尋常有客過山塘澹若僧家趣味長野鳥助談花共笑一

杯清茗一爐香

初夏楊祕圖過訪

朝雨絲絲長石楠楝花風暖未全南田翁杖竹監收麥邨
女筐桑學食蠶特有閒情便野屐肯將疎髮誤朝簪洗杯
正值池亭月得與同心一夜談

早秋集南屏入翠樓

草閣臨城帶柳邨卷簾長日望龍門帆來遠浦分雲影鳥
度橫山入雨痕七月新涼仍御葛十年舊社更開尊相看
好醉東江月不盡功名且未論

丙辰中秋山樓懷祕圖

昔年曾共桂花芬對酒山樓月掩雲今夜月明仍對酒清

黃氏撰錄集
光何處共君分

夏日訪雲江漁者不值三首

一樹槐陰覆滿庭
幽禽時下石苔青
若疑有客尋詩到
盡日雲扉不爲扃

石室紅葵花自明
主人何處索詩盟
清廚畜得春茶在
剪髮家童亦解烹

已聞四月度西陵
覓得三吳句未曾
惆悵不堪紅日落
碧關芳草幾回凭

山居

習業青山僻山堂
早暮開泉聲雲護出
松影月移來書案
積春靄花階生雨苔
石梁時入夢疑在小天台

睡起孫清溪偶過

道人午睡醒自起
洗茶鐺啼鳥在山谷
飛花來草堂身閒
增性嬾山靜覺春長
有客能相過西關話夕陽

暮春

十年長客路二月暮
春天邨市茶新估
山溪草欲填鶯啼
梅子小燕蹴柳花圓
多少江南思聲聲積杜鵑

發儀真

片帆十月下吳門
曉發真州水國昏
千里寒雲迷雁信
一江晴日下潮痕
打魚舟渡蘆花浦
賣酒旗懸柳樹邨
聞道綏陽胡馬劇
捷書誰與報崑崙

過孫樂隱山房次楊祕圖韻二首

結菴萬山僻懸溜出松關林鳥鳴逾靜巖花開自閒客來
青石峽鹿臥白雲灣此地堪幽賞何妨帶月還
樂隱南山叟山堂晝亦關野情惟鶴識幽意與雲閒流水
桃千樹春風藥一灣余逢古崖上相對欲忘還

山居成楊祕圖見過

卜隱蓬玄上開軒紫翠分澄宵一輪月澹曉數峰雲花氣
座間入泉聲枕上聞偶來懷玉子杯酒共論文

九日登龍山和饒字韻

萬峰收雨一登高扶病猶忘著屐勞霽海樓臺看蜃氣晚
天雲日見鴻毛不嫌霜鬢簪黃菊共羨新詞若絳桃豈料
詩人劉夢得自言無句可題饒

八月晦日集龍山遠覽樓

西風搖落動高秋極目瑤天爽氣浮島嶼萬重連海嶠芙
蓉十里照江州帆迴遠浦寒潮上雁下平田晚稻收瞬息
又逢重九至正開黃菊再登樓

盛暑集衆樂園

酷暑無從避相邀宰相家山臺依密竹水閣照清沙風墮
秋前葉人簪醉後花謾誇河朔飲輸却老僧茶

錫山茶
極佳

夏日幽居次徐後泉韻

翠積南屏雨乍晴石堂梧竹早涼生歸田羸我能籠鶴靖
海憑誰敢射鯨日永坐添香鼎篆月明頻聽玉簫聲十年

黃氏攬殘集
霄漢風雲氣都作山林薜荔情

曉過燭湖東孫容峰

曉行十里燭湖塘一帶橫山啓曙光隔塢鳴雞催落月平
沙起雁帶新霜蕭疎野水菰蒲綠寂莫園籬橘柚黃聞道
湖南高士臥滿牀書卷閉秋堂

太虛樓晚眺

上方樓閣獨臨湖灑灑雲窗列畫圖寒嶼萬堆秋可疊晴
波千頃夕如鋪相依紅樹漁舟並忽下蒼煙野鷺孤感慨
前朝舊基業老年看劔氣猶粗

元夕雨

暮雨霏微月暗時一番寥落負燈期大堤塵濘香車柅甲
館煙沈翠幕垂何處孤尊春寂寂幾更清漏夜遲遲山人
原厭紛華事獨倚梅窗想舊詩

烹茶次張龍峰韻

睡起西窗意澹然自烹春茗試分泉已知功業如殘夢若
與煙霞有夙緣灑灑清風還竹院融融遲日正花天道人
旣得閒滋味城市山林總是仙

天竺遇王鍊師

獨往覓丹丘山青宿雨收鳥藏深樹語泉帶落花流絕磴
三天界空林四月秋相逢王少室松下說雲遊

孫瑞峰宅觀白牡丹

黃紫江南幾處花玉容惟見上丞家臨風獨笑春爲澹承

黃氏攜笈集
露還矜月共華一任清芬猶國色不須濃豔自天葩醉來
忽作瑤臺夢恍遇梁清油壁車

冬曉山行限韻

曉行山脊冒霜嚴吁氣成冰欲斷顙戍角五更遮笠聽征
鞭十里裹衣拈滄溟日出纔分曙島嶼雲還僅露尖遙指
邨橋將市酒梅花開處見青帘

丁卯歸田東楊祕圖

誰謂狂奴強健年倦遊方喜得東還一尊家釀書千卷百
畝溪田屋數椽霄漢豈無赤紱眷山林原有白雲緣西陵

舊是清賢路

清賢嶺支謝
往來之路

拄杖豈辭山谷偏

東歸卜宅

千里歸舟下豫陽百年遭際媿行藏野情自遣惟詩卷病
質相從有藥囊謾說鳳毛池上見尚餘龍氣斗間揚乾坤
容我原無限隨意溪山著草堂

再過半山堂

春風重過半山堂依舊千峰入座蒼更有好花明後院旋
添新竹蔭虛廊畫圖想像摩雲谷詩句模糊認雨牆却怪
山禽似相識向余啼上臥龍岡

茅菴

小結茅菴傍獨邨祇同花月自寒溫夜來中酒連衣臥却
有春風與閉門

蹋青

滾滾芳塵二月天
蹋青時節已啼鶉
相逢南陌人如玉
不
是花邊卽柳邊

春日過玉蘭堂訪渠翁不值三首

春日相過相國家
春堤朝雨浥新沙
雲輿偶出知何處
傳
道西園自種花

日麗春庭長藥苗
朱闌都曝舊恩袍
微名不用通鸚鵡
自
立東風看碧桃

一片雲封白玉堂
祇橫梅影在書牀
主人何處探春去
竊
爲添燒小篆香

戴山戒珠寺

句踐曾因采蕞來
右軍還築寫經臺
先年蹤迹俱寥落
唯

見春花滿郭開

溽暑憩祕圖書屋

避暑玉華居
趺坐青篔席
衆木作秋雲
一蟬鳴午寂

移杯北窗下
清風灑芝草
自歌棲鳳篇
遺我鳴蟬橐

時祕
圖出

其先君古訥
先生詩橐

初夏歸山中

一月春山別歸來
石室塵草深迷後
院竹長過西鄰
穉犬
能嗥客馴禽不避
人呼童煮新茗自
整舊綸巾

衆樂園送渠翁之越

西園二月正芳華
却駕仙舟去若邪
只恐歸來春已暮
雨
巖先看未開花

春詞四首

上元誰得掩青娥無復新詞寄夢和何處月樓吹玉笛小
梅枝上落花多

長安曾識舊書仙一別花時已隔年昨日西齋春睡起偶
然翻得贈行篇

黃四孃家春已賒杏紅李白染溪沙少陵老去風流在日
日能來醉浣花

花暖平康囀早鶯美人三曲盡春聲當年怪底征西帥肯
以封侯易愛卿

春書

客去春軒已罷棋寥寥春晝日遲遲道人獨傍朱闌坐閒

看松陰帶鶴移

初夏

穠芳銷盡綠陰圍紅杏含桃子漸肥忽訝鳥聲更杜宇又
欣花事到薔薇舊巢處處翻新燕新水看看長舊磯正是
麥秋天氣爽朝來莫便減春衣

輓祕圖高士

自從解綬入秋雲何處看山不共君十載論心成往事一
時垂淚惜斯文誰收遺藁將千首得見行書有八分幾聽
鶉啼江月白媿無碑記郭公墳

竹橋十詠序

蟄菴黃公以教授致仕歸鄉徜徉山水之間列爲十景各賦七言律所謂竹橋十詠也予童時見其偉衣冠皓鬚眉巍然達尊少長聞鄉評以公爲首稱今誦十詠則又知其爲大雅君子也大雅變而爲風風變而爲騷後世山野江湖之吟多出於風騷其敝也則睥睨天地嘲弄風月留連花鳥迂誕則荒寄傲則放託意則滯於形色忘形則混於庸鄙甚至以夢幻爲真境以罵詈爲高致嗚呼是風騷變而入於亂也公十詠雖蕭散閒遠超於塵外而其戚話農談孫謀黨規水旱之憂稼穡之樂泉石之趣時物之感皆本於性情安於義理篤實光明溫厚典則之氣藹然可掬

黃氏齋集
所謂大雅君子豈不信然乎哉論其世者於此亦可見其
槩矣予不揣僭和鳴瓦缶於黃鐘之側黃氏秉家乘者擇
而取之可也嘉靖辛卯歲臘日小野倪宗正書於清輝佳
氣樓

蟄菴先生集序

蟄菴先生諱海字伯川領天順壬午鄉薦以字行更字德
洪屢赴公車最後以會闈失火幾罹其災遂絕意進取自
號蟄菴以見志家居數載徵爲建寧縣教諭改任樂平九
載考最陞建寧郡博郡爲朱夫子過化之地又遇先生之
如胡安定者爲之師作人成化名動京師爰膺陝西典試
之命不次之榮也而先生處之泊如闡事甫畢卽致仕歸
徜徉山水以詩文自娛然興至疾書隨手而散笥無存橐
其文止見有族譜序一篇餘文無可裒集其詩亦不少概
見憶崇禎戊寅冬十月先生故居更易新主子姓遷移家
具擔頭遺一敗簾余偕仲兄二晦竊爲啓視於亂帙種種

中得先生手書竹橋十詠并同時諸公賡和之作如獲大寶仲兄因乞之以歸裝潢成卷予時時過從共相吟誦者有年忽一日仲兄有震來之厲億喪其貝卷亦云亡幸存抄本若不亟爲表章聽其蟲蠹鼠嚙究歸滅沒罪莫大焉會主一於著作國史之暇謀取先遺獻家藏遠祖遺集彙授剞劂因不禁蹶然起曰是予志也用是摩挲老眼繕寫校正黽勉從事以庶幾相與於有成至十詠之本於性情安於義理和平溫厚卓然大雅之音不襲風騷之變庶常小野倪公詳哉其序之矣予小子何敢多贅七世孫宗裔百拜敬識

竹橋十詠

通德名鄉

黃伯川

姚江江畔古名鄉萬二千家俗善良四境淳風新教化幾家喬木舊門牆稽山鍾秀西來遠舜水流清東去長洵是地靈人自傑衣冠前後世相望

和

倪宗正

名鄉是通德不知因者誰直道猶三代淳風自四時社會歌吟地鄉評禮義資可封看比屋闕闕映茅茨

管溥

文彩翩翩自一鄉衣冠前後際明良雲山人畫開書屋風雨揮毫戰堵牆俗遠豪奢風氣古家傳詩禮慶源長

黃郎更有波千頃今古汪汪協令望

徐彬

吾邑名聞通德鄉淳風美俗果賢良前脩已見無踰矩
後學何曾有面牆古路榱題橋梓盛剡湖風月歲時長
當年喬木依然在世代相傳令聞望

招賢故里

黃伯川

一里民居庶矣哉昔人曾此召賢才風雲合勢非無會輝
氣相求自有媒重璧不須兼厚幣黃金何用築高臺吾人
白首耽肥遯漫報徵書天上來

和

倪宗正

徵書到林麓賢者尚畱名白屋畫圖去青雲羽翼生一
犁莘野迹萬卷草廬情猿鶴徘徊處雲山秋夜清

管溥

九重高拱喜明哉寤寐詢求曠世才華國文章來重聘
破窗燈火寄良媒山川秀毓南陽地雲日輝生郭隗臺
老我閒情賦歸去天書莫遣鳳銜來

徐彬

古里招賢安在哉廣招賢士重英才景行哲士何爲主
仰主高山自作媒折節傾心爲束帛卑辭厚禮勝金臺
當時肯下陳蕃榻能使南州特地來

官埭義塾

黃伯川

官埭西當浦盡頭故家書塾義無求立心只欲容來學見

面何從問束脩鄰里童蒙資講習閭閻子弟任趨摳至今
禮義遺風在絕勝豪門事佚遊

和

倪宗正

義塾開官埭賢哉兼善規孟嘗空養士李固免尋師青
山燈火夜白屋杏花枝遺風猶未泯樵牧半清辭

管溥

堂堂書塾水西頭遠近朋來任講求化雨傾心開後學
春風凝坐憶前脩便行脯贄誰曾問去地裳衣却共摳
笑殺明經老儒碩門牆只許貴人遊

徐彬

書塾弘開勝地頭朋儕遠近自相求春風欲啓心聾聵
後學何妨路阻修束脯不嫌爲贄見坐隅原自攝衣摳
當時絳帳如重集且喜門牆樂勝遊

平原別墅

黃伯川

招賢東去是平原別業新成數畝寬莫道田園堪隱逸也
知稼穡更艱難青松枝小雨前種黃菊花馨秋後看客至
不妨無物待烹葵炊黍勸加餐

和

倪宗正

青山壓茅屋陰陰花竹開雙屐曾經處一枰誰博來養
心宜隱逸回首絕塵埃平生厭城市得此足徘徊

管溥

茅堂寄在百花原彭澤歸來天地寬煙雨一犁生事足

黃氏攬殘集
風波滿眼世途難機忘白鳥吟邊下雲帶青山靜裏看
客至不妨清話久芹羹雞黍野人餐

徐彬

極目江南第一原此中棲息自心寬只知稼穡登場樂
不識功名到手難歲月盡從閒裏過詩書還向靜中看
紛紛俗慮俱忘却抱剡長吟日餐

箭山擁翠

黃伯川

巍峨獨聳勢巉巖泰華誰移在越南一雨初收春染黛片
雲不翳曉拖藍地中磅礴鍾靈秀峰上氤氳起碧嵐古柏
喬松同一色誰知石下有龍潛

和

倪宗正

箭山高百丈空翠拍天浮雨意常含潤山光爛不收斜
拖白鳥陣倒洗碧潭秋嬋娟如可攬獨倚夕陽樓

管溥

禹穴空勞不遠探奇觀咫尺在江南卷簾山色搖青黛
照眼天光鬪蔚藍翠律奇峰雲外網緼瑞氣樹頭嵐
去來自是天工意分付山君莫浪潛

徐彬

孤峰玉立石巖巖泰華移來勝地南雲卷山頭鴉背色
雨餘樹杪靛花藍瘦藤老柏涵秋色古壁蒼崖滴碧嵐
我欲捫蘿登絕頂只愁驚起老龍潛

剡水環碧

黃伯川

剡湖佳勝似山陰剡水環流徹底深清浸落霞秋色繞靜
涵明月夜光沉縈迴漾綠春還夏宛轉按藍古到今最是
詩人可乘興臨觀幾度發長吟

和

倪宗正

曲曲剡溪水新藍春漲餘柳葉染成碧桃花點作緋不
關南浦意復借夕霞輝童子釣遊處古痕苔石磯

管溥

溪流屈曲大江陰環却茅堂淺更深倒浸青天涵上下
遠銜碧樹半浮沉鴨頭溶漾來天地繒眼空明照古今
最是臨流動詩興倚闌時復一長吟

徐彬

剡水滔滔天作陰茫茫無際莫知深淺涵歸鳥影將墮
輕漾明蟾光到沉曲折千流來自古縈迴萬派到于今
秋天秋色渾相似聊爲詩人倚杖吟

東溪觀漲

黃伯川

過雨東溪水驟生一時駭目使人驚平原兩岸舟難濟砥
柱中流勢欲傾鷗鳥波心還出沒魚龍浪裏自無因
導入江河去萬里朝宗就下行

和

倪宗正

溪漲一夜生亂流縱復橫山脚吞欲盡浪頭翻未平高
張跋扈勢微動乘槎情此理忽有悟一氣自虛盈

管溥

半篙春水坐來生小立溪東只自驚散漫兩涯無地著
奔騰何處有天傾鼉鼉窟裏龍爭鬪楊柳枝頭浪未平
寄與舟航■年少安流明日任君行

徐彬

東溪昨夜雨餘生沙上眠鷗夢亦驚駭浪翻飛三峽倒
洪聲撞碎一坻傾路迷堤口人難渡船上橋頭石已
安得三千強弩射頓教平土唱歌行

西浦臨清

黃伯胤

迢迢西浦似東溪俯鬪清流靜自宜幾曲悠然生逸興一
泓徹底浸詩脾落霞倒影沉還見鷗鳥忘機止不疑再濯
我纓歸去晚滄浪歌罷少人知

和

倪宗正

西浦何澄徹坐臨明鏡中塵根洗以盡性體悟而空沙
鳥情相狎淵魚樂與同滄浪歌一曲隱隱水雲東

管溥

水深一曲淨漣漪臨水徜徉事事宜空洞洗清莊子眼
澄鮮涼沁少陵脾塵空境界通三鳥影落雲山亂九疑
濯罷塵纓漫回首一襟清興有誰知

徐彬

清流一派清溪夏日臨流興自宜數里漣漪開醉眼
一泓澄徹入詩脾沙明鳥篆人皆識波靜鷗盟自不疑
盡日濯纓難忍去滄浪清味屬誰知

南坡曉牧

黃伯川

未曉驅牛出遠阡農家生計在春田綠蕪短短霑雲露橫
笛鳴鳴入曙煙臥向坡頭多茂草飲從澗下有清泉待
食飽扶犁去扣角誰吟白石篇

和

倪宗正

曉牧烏犍去一坡春草豐煙溪熟途路鄰伴狎兒童隔
越豺狼道平安牛馬風野歌反扣角此日慶遭逢

管溥

曙分西陌與東阡黃犢依人到野田人立坡頭看落月
草深犢口帶晴煙暖風隔隴聞蘆笛飽飯平原飲澗泉
何事古人過夜半南山白石賦詩篇

徐彬

雞鳴北陌與南阡忙起驅牛出野田載笑載歌尋牧地
相呼相喚朝煙橫吹攜笠倚牛背倒跨楊鞭飲澗泉
天晚歸來明月上逍遙又檢飯牛篇

北野春耕

黃伯川

舍北春歸布穀鳴農人田事又關情蒸藜炊黍梳風食頂
笠披蓑冒雨行瘠地草多宜熟治薄田土淺用深耕一家
衣食并租賦百苦千辛望有成

和

倪宗正

細雨鶉鳩啼春風忙把犁雨足耜前水雲翻耒後泥深
耕盡犢力厚獲祝豚蹄帶經看未罷小憩夕陽西

管溥

幾多野鳥傍春鳴
布穀聲中獨有情
曉餉未遲先喚醒
東菑欲動便催行
陽回土脈和煙煖
春滿田疇帶水耕
莫笑勞勞生計拙
野人俯仰屬秋成

徐彬

布穀聲聲北野鳴
相催東作似多情
漫隨烏犍荷鋤去
且著青蓑帶月行
欵乃農謳何處起
高低雨足向田耕
秋來百室皆盈止
老稚大有成

